

KIFER BIZIN VOTE PU LALIT

Nu depann lor u ek u bann kamarad pu vot LALIT. Selman, anmemtan bizin *mobilize otur nu program*. Kumsa *ansam* nu pu fer li vinn enn realite. LALIT osi depann lor “internasyonalism”, setadir nu bizin viz pli devlop lyin ek parti kuma LALIT partu dan lemond. Kumsa *ansam* nu pu fer sosyalism vinn enn realite partu. Li irzan. Sistem kapitalist pe detrir planet, gard laplipar imin san ni lavwa ni paver, e pe servi represyon pu klas kapitalist gard so monopol lor kapital ki tu dimunn finn donn kudme kree.

Ala enn apersi kifer bizin vot LALIT.

Travay

Bizin kree plas travay stab pu tu adilt. Pu sa, bizin kumans par servi later ek lamer pu prodiksyon itil. Sa vedir bizin kumans ranplas plantasyon kann. Dayer disik pena pri lor marse. Larzan piblik pe met sibsidi dan pos planter ek tablisman. Amizir tablisman an-dete, li pe bayant later pu mont vila de-lix ek terin golf. Gubernman bizin aret sa politik ekonomik la. Bizin servi later pei pu plant prodwi alimanter otur lizinn ki bizin monte vit-vit pu prezerv sa prodwi alimanter la, export li. Anmemtan, bizin servi gran letandi losean otur nu Repiblik pu kreasyon anplwa. Kan servi later-lamer kumsa, li pu kree anplwa dan karo, lor lamer, dan lizinn, dan transportasyon, dan resers, dan marketing. Li pu liber lespas pu lozman. Li pu fer deviz rant dan pei.

Ekoloji

Bizin lagrikiltir ek lindistri, osi byin ki enn sistem transpor, ki respekthe lanatir. Bizin aret polisyon ki rwinn later, lamer, ler. Pestisid, erbisid ek fertilizan simik, bizin ranplase par enn apros ekolojik. Bizin *bicycle lane* partu, e lale pyeton partu. Sirtu bizin planifye pu zot konverz lor lagar Metro Express, e lor lagar bis.

Kumsa bizin mwins transpor prive. Taxi bizin organize pu met zot prop sistem kompyuter koperativ, kuma Uber ena kote prive.

Lozman

Bizin lakaz pu sak fami, inklir sak dimunn ki ule demenaze depi enn fami vyolan. Lozman bizin konstrir pu lamas dimunn ki travay, pa pu vila milyoner. Seki pe res dan lozman danzere – kuma lamyant ek lakaz san kolonn – bizin gayn nuvo lozman dirzans.



Langaz Kreol

Bizin introdri langaz Kreol kuma enn opsyon dan Parlman. Langaz maternel bizin baz pu enn ledikasyon milti-leng. Sa vedir Kreol bizin vinn medyom ekrit, pu texbuk ek pu lexame. Kapav osi gard texbuk an Angle.

Kestyon Ladrog

Bizin dekriminaliz gandya. Bizin aret servi represyon kont itilizater gandya, e kont dimunn ki fini malad ar depandans lor ladrog kuma lopyom, ubyin sintetik ek simik. Adiksyon li enn kestyon lasante piblik.

Liberasyon Fam

Bizin ena tu fasilite pu fam gayn travay, lakaz ek manze pu ki li kapav ena lemwayin ranpli so rol dan lafami. Bizin aret met lapolis lor fam ki

ena rekur ar lavortman.

Aprofondi demokrasi

Fode nu kapav revok seki nu elir. Sa vedir nu bizin sanz lalwa pu permet elekter kas syez enn depite atraver enn petisyon elektoral an-bon-e-di-form. Li osi ule dir ki lansanb bann depite, osito zot tu eli, zot zwenn, e elir Premye Minis. Kumsa, zot kapav revok li. Premye Minis bizin gayn enn mazorite dan Parlman pu so Kabine. Kumsa, depite kapav revok Minis. Kan pe introdri plis demokrasi, bizin tir laspe kominal dan sistem best loser anmemtan.

Diego ek Chagos

Apré viktwar Nasyon Zini, bizin re-inifye Moris, fer ferm baz Diego, fer netwayaz ekolojik. Bizin Gubernman pran enn bato, al Chagos. Chagosyin, kuma Agaleen, bizin ena enn Lasanble Rezyonal kuma Rodrig ena, osi byin ki enn sirkonskripsyon pu sakenn.

Servis Sosyal

Servis sosyal kuma lasante, ledikasyon, pansyon bizin res iniversel.

Sistem lopital ek dispanser bizin amelyor so servis. Pu sa, bizin ena enn kapasite pu staf lopital azir pu rann lavi pasyan pli bon posib, osi byin ki donn enn swin top. Ledikasyon bizin vinn pli egal partu. Pansyon vyeyes bizin res iniversel.

Tax

Bizin enn sistem tax ki pran ar seki ena buku rant, e ar seki ena buku di-byin. Sa vedir ki TVA bizin ranplase par tax lor reveni e lor dibyin.

13 Oktob 2019

KUDME

Pu donn kudme, kontakte mwa, Alain Ah-Vee, LALIT, 153 Main Rd, GRNW, P.Louis. Tel: 208 555 1 lalitmail@intnet.mu. Antretan vizit nu websayt: www.lalitmauriti.us Printed by LALIT, Main Rd, GRNW.

Politik Parti LALIT: Ki Diferans depi Lezot? Enn Politik baze lor lalit ant klas!

Zordi an 2019, puvwar reyel Repiblik Moris li tuzur dan lame enn poyne proprieter gran kapital ki, andeor sistem demokratik. Sa klas proprieter la, limem pran tu desizyon inportan lor lavi tu dimunn. Sa klas, li, li tuzur proprieter tu sa mem-mem lantrepriz ki ti angrese atraver lesklavaz pandan premye 100 an listwar Moris, Rodrig, Agalega, Chagos, e atraver langazman pandan dezyem 100 an listwar Repiblik Moris, ziska 3yem plis ki 100-an esklavaz lapey (“wage slavery”). Sa vedir ki sa ti-grup dimunn ki posed lizinn, la bank, konpayni lasirans, lotel, klinik ek liniversite prive, tablisman, e zordizur sirtu seki fer spekilasyon lor later (“imobilye”), zot literalman kontrol lavi sosyete Moris an-antye, anmemtan ki zot pe *fer larzan* par zwe aksyon dan stok exchennj, anmemtan ki zot aste-vann tu sa but lekonomi la. Nu depann lor zot. Nu tuzur viv dan enn form esklavaz modern: apel sa *wage slavery*, esklav lapey.

Travayer ki kree larises

Purtan tusala – lizinn, devlopman later, lotel, labank – li kree par sa gran lamas dimunn ki pa proprieter kapital.

Alor, LALIT enn parti ki deza chalennj sa. Sa rann nu diferan depi lezot parti. Nu rant dan eleksyon kuma enn parti avek enn stratezi buku pli larz pu *sanz sosyete*. Nu ule eleksyon form parti enn gran muvmann pu amenn sosyalism. Kan u vot pu LALIT sa vedir u pe met u lavwa ansam pu sa kalite sanzman buku pli profon ki zis enn sanzman enn-de depite, mem enn-de Minis. Pa zis Parlman ki u pe viz sanze ar u vot, me sosyete an-antye ki u pe viz sanze.

Pa zis nu viz pu sanz sosyete enn zur dan enn lavenir lwin par divan, me nu deza met sa sanzman lor azanda asterla. Dan eleksyon nu pe deza gete kimanyer rant dan enn kont-ofansiv kont kapitalism pu amenn sosyalism.

Sel manyer anfet sanz sa form lorganizasyon debaz sosyete ki pe amenn larwinn zordi – avek inegalite agran-

disan, polisyon extrem, destriksyon later agrikol – li atraver zwenn ansam dan tu kalite diferan lalit kuma nu finn fer dan LALIT, e kuma nu pe fer zordi, dan sa eleksyon la. Enn vot pu nu, li esprim sa langazman dan lalit praktik kont sistem kapitalist. Nu dan LALIT, nu artikil nu lalit pu sosyalism, ansam ar lalit kont patriarsi, kont tu form dominasyon, e pu met ekoloji dan sant tu laspe nu program. Nu lalit, li form parti enn chalennj ki bizin vinn internasyonal – e ki deza internasyonal – e kumsa ki pu ena enn ranversman sa sistem internasyonal ki apel sistem kapitalist.

Aksyon lamas dimunn

Depi muvmann etidyan ki kilminn dan Me ’75, atraver gran miting lamas fam Zardin Konpayni dan 1978, atraver gran lagrev zeneral Ut ’79, travers mobilizasyon lamas Septem 80, pandan mobilizasyon fam dan lari lor kestyon Diego Garcia an 1981, atraver enn ledikasyon pu anseyn literesi dan enn muvmann demas an 1982, ki LALIT ek manb LALIT finn deza chalennj sa realite la. Mem pandan sa downturn ki finn swiv apre sa dan bann lane ’90 ek 2000, nu finn kontiyn dan muvmann demas travayer konstriksyon ki ti lisan-sye depi *Central Housing Authority* ek *Development Works Corporation* ki ti zwenn ansam ek *Muvman Lakaz* dan manifestasyon lari e dan lokipasyon lakaz ki Guvernman pa ti livre mem kan ena siklonn. Lepok ant 1996 ek 1999, avek *All Workers Conference* dan Rodrig ek Moris, kot manb LALIT finn partisipe, nu finn kree e mintenir enn inifikasyon muvmann sindikal.

Depi 2002, e ziska 2019, nu pe mobilize dan enn muvmann otur kontrol demokratik lor totalite later Moris: nu pe liye lalit pu ranplas lakaz lamyant avek lalit pu servi later agrikol pu kree anlwa, pu ranplas plantasyon kann par plantasyon prodwi alimanter pu sekirite alimanter e atraver prezerv e transform manze, pu asir deviz. Nu finn mobilize peser, pu liye sa lalit la ar

kontrol demokratik lor lamer osi byin ki later. E nu finn liye sa kanpayn pu kontrol lor later ek lamer, ek reklamasyon Diego Garcia ek Chagos. Kumsa anmemtan nu viz enn form agrikiltir ek lapes ki sutenab lor letan, ansam ek enn swin pu lanvironnman – ki li lamer ub-yin later, ki li ler ubyin larivyer. Selman atraver enn lalit pu plis demokrasi ki nu kapav anpes patron tablisman, lotel, lizinn kontiyn polye nu pei. Selman atraver enn lalit kont represyon e pu plis laliberte ki nu kapav konfront sa Leta ki finn met dibut pu dominann travayer o-maximem, sanki sa dominasyon la provok rebelyon.

Samem dan nu brans lalit, atraver nu Revi LALIT, e dan Komisyon LALIT lor diferan tem (ledikasyon, sindika, lekoloji, langaz, fam, Rodrig, Chagos, zenes, kont sirveyans Leta), nu fer 2 zafer ki tultan artikile ansam:

- LALIT rod konpran *lozik intern* dan derulman listwar leprezan amezir li pe deferle.

- LALIT rod organiz dimunn pu azir lor baz enn program pu sanz sosyete la. E zordi, dan kanpayn elektoral, nu pe poz kandida pu ki nu avans sa lalit la. Pa krwar dimunn ki dir *Ah, LALIT pa pe rod vot, li*. Nu ule u vot pu LALIT. E nu ule ki sa vot la, li reprezant u lakorite ar nu, kumkwa bizin sanz sa sosyete la, donn lamas dimunn plis puvwar.

